

配以剛其峽乃貴則廉之文明富庶實嘉
賴之向因兵燹圯廢康熙十六年郡丞田
鍾雨首倡建復廟後建生生閣則專城遊
擊王家棟創之李奕桂修之先後詳勸於
石

惠澤廟

在府治東龍門水上祀五海龍王之
神有故碑黃文中記弘治十八年歲

在乙丑夏旱三月不雨苗稿大半時
祈禱諸廟壇不應既而閱一統志郡治東
龍門水上有廟曰惠澤凡旱取其水禱雨
輒應遂往祈時太監韋輔親與神約曰若
禱後三日得雨則新其廟卽日命羽流設
壇於元妙觀約各官齋沐往龍門取水既
歸是日午刻雷轟不雨已酉雷轟微雨庚
戌雷轟雲合雨大注自辰終午而止辛亥
復大雨衆咸異之曰茲土之神能使雷雨
如期而應澤物之功大矣其顯如此不新

厥廟何以荅神庥乎韋遂于六月乙卯新其廟時有詩褒其事知府周夔作詩序今廢

真武廟

在元妙觀之後嘉靖十九年知府陳建卽舊啟聖公祠改爲之今遷北譙

武安祠

在新城內洪武三年建嘉靖元年提學魏校拆毀十三年指揮張浚復建

今廢

楊梅廟

在府治東南六十里相傳昔有盤石浮海而至漁人以爲神因祝曰若得

魚副所期當立祠以報果如所祝遂昇石至楊梅繩斷卽其處立廟凡水旱疫癘禱之卽應洪武二十九年通判夏子輝爲採珠重建今廢

關帝廟

在府城內興賢街南向

華光廟

在府城西門外今重建殿宇戲樓

伏波廟

州縣皆有漢馬援征交趾時經此土人祀之有禱卽應既廢崇禎九年合

浦知縣向宸改建于海角亭後今亦廢

天妃廟

一在府治南八里九頭嶺洪武十五年千戶林春建嘉靖十八年指揮劉

滋重建按天妃祠著跡興化軍世傳湄州林氏女爲神能知人禍福歿而祀之號神通賢女航海者有禱輒應俗呼達天妃廟久壞萬曆三十年知府余巍修復明敕賜昭孝純正靈應孚濟天妃康熙三十年郡丞張輔重修一在海角亭陰僉事張士純顏其楣曰握元昭貺康熙五十七年知府施世驥捐資重建廟前海角亭五十九年同知徐祖望拆毀神像是年冬知府徐成棟修復懸其扁曰神昭海若并將廟後之

道婆踞住潮音菴清出壙
充後殿添作義學書舍

觀音堂

在府治南半里成化間陳內宦建萬曆二十八年同知陳王道增其制久

將圯康熙十一年
鄉人重葺

平江廟

在府治東南七十五里清和鄉平江池岸洪武二十九年通判夏子輝爲

採珠立
今廢

鎮海廟

在府治南八十里冠頭嶺下洪武八年巡檢郭成建今廢

三皇廟

元海北南道楊成式記今廢此伏羲神農皇帝也前朝郡邑俱建洪武四

年遣使祭歷代帝王陵寢
始罷天下府州縣祀三皇

三界廟

在府城南五里

三官廟

在城西門外

北府廟

在府治東一里八景之一宋史李師中攝帥事以檄定交趾及儂智高子

宣旦降之祠稱李大夫疑此人也成化十七年知府劉煊復立嘉靖元年提學魏校

毀之

武刀東廟

在府治東六十里地名武刀東村今廢

武刀西廟

在府治東六十里地名武刀西村今廢

西海廟

在府治東南六十餘里清和鄉已上三廟洪武二十九年本府通判夏子

輝為採珠建令俱廢

譚村廟

在府治東譚村洪武四年士人陸愷建今廢

助化廟

在府治北半里爲造海船建成化十七年知府劉煊拆毀後鄉人復立今

廢

欽州

三皇廟

故址在城南半里元馮明孫譔記洪武四年罷祀今廢

崇寧寺

在州東門外埠通坊舊儒學右正統五年守備都指揮程場建嘉靖二年

提學魏校拆毀
以其地爲社學

元妙觀

在州東門外正統十三年都指揮于羽建

關王廟

在州治西

天妃廟

在州治南鎮民坊

烏雷廟

在州治南五十里白皮嶺
下唐以來碑記尚存

北府廟

在州治東北二里中和坊昔邊帥李
令公名師中者有功於民鄉人祀之

今廢

雷廟

在州治南五里
赤勘村今廢

靈山

大雲寺

在新城西北正統十二年僧興寧募
緣建久廢成化九年僉事林錦重建

以爲祝聖之地
今脩葺重新

陟熙寺

在本縣治上武安鄉舊有石
龜土人呼爲石龜寺今廢

泗州寺

在縣治宋泰
鄉白沙村

關王廟

在千戶所東景泰元年千戶趙敏建

響應廟

在縣治西石六峯下今損壞

六峯觀

在縣西一里石六峯上高可百丈四周皆石壁中空而平嘉靖二十一年

齊人劉元清募緣重建前小岩教論吳昇刻吳道子觀音像其中

龍廟

在城西十五里山北石龍洞內片石廣五丈許下潭甚深禱雨輒應萬曆三十

三年知縣陳文選鼎建

僊釋

愈上人合浦人以詩名嶺外將訪道南岳留

詩壁上云閑伴孤雲自在飛東坡居士過其

精舍和詩云孤雲出岫豈求伴錫杖凌空自在飛爲問庭松尚西指不知老衲幾時歸

陳楠宋徽欽時人有道術浮沉俗間人無知者嘗行欽管道上遇羣盜拉殺症之後三日盜散復蘇蒼梧旱楠執鍊鞭入淵驅龍須臾雷雨交作境內霑足嘉定中入水而逝蓋水解也自號翠虛所著翠虛妙悟集白王蟾傳中亦謂翠虛解化于臨漳云

李受宋時郡人隨主赴五開倉大使未幾主卒于官受負骨并送主母還鄉遇鄱陽遇風爲舟人所覺欲棄去受負之投岸艱苦萬狀問途歸葬爲人傭織供奉主母母終後入羅浮山訪仙數年坐石而化

唐本淨禪師絳州人姓張幼披緇受偈于曹溪之室隸司空山無相寺後住廉之東山寺

天寶三年中使楊光庭曾作禮信受佛道之
論後詔至京召兩街名僧與闡揚佛理上元
二年歸寺寂
諡大曉禪師

安南志附

按周成王時交趾南有越裳氏重驛來朝越
裳卽九真也秦始皇郡縣天下以交趾隸象
郡漢高祖立趙佗爲南粵王王擊桂林象郡
并交趾而有之武帝遣路博德討平南粵置
交趾珠崖等郡元帝罷之因賈捐之請也光
武遣馬援征女子徵側立銅柱爲漢界獻帝